

四庫全書

集部

欽定四庫全書

集部

秋澗集卷

六十八至
七十一

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官編修臣于鼎

謄錄監生臣賀誥

欽定四庫全書

秋澗集卷六十八

元 王惲 撰

翰林遺藁

擬中書省賀河清表

伏以天開昌運統一車書地應休禎河清陝洛

如式恭

惟皇帝陛下德昭天漢恩溥淵泉覆露何止於中華洋
溢遠霑於方表以致潤涵九折鏡淨兩涯自陝至汜幾

千里之遙由乙至丙逮三旬之久鱗介之泳游可鑑山林之形影皆分躍圖馬於龍宮未容專美舞馮夷於鱗屋時出効靈顧茲上瑞之方增特表吾君之至聖臣某等叨居華省幸覩榮光敬傾葵日之誠用代辭人之頌遐荒嚮慕百川宗滄海而王寶祚洪延萬壽等丹丘之

固

又上澄下澈光昭四表之平
國晏民安永溢萬年之壽

擬聞捷賀表

天網雖疏曾恢恢而有失罪人斯得迓穆穆之來平外

侮既消頌聲交作臣某等誠歡誠抃頓首頓首恭惟皇
帝陛下仁含動植德婉生成振長策而用三驅念天顯
而惇九族薦雷之震遠驚而邇懼大風之舉歌動而雲
揚側聞喜自於日邊豈止威加於海內臣某等職叨省
署阻奉鑾輿竚目龍旂遙伸虎拜歸牧武成於周馬歌
功美邁於唐饒六轡言還春動兩都之和氣千官飲至
歡騰萬歲之霞觴

如式

中書省賀正慶八十表

甲午歲

伏以明堂受籍萬方歸一統之尊神策探祥八秩開大
椿之首稽諸前古曾未多聞中賀恭惟皇帝陛下德本
至仁天申顯祐維神聖之廣運致功業於獨高粲然萃
三代之英蔚爾創一家之制與天立極躋世於平我澤
我威洽乎南而暢乎北曰聲曰教漸于東而被于西方
且通達下情蠲除積負肆赦恩而哀矜庶獄扇泰和而
煦育羣生宜福壽之貺如川方增見寅畏之心維日不
足端臨元會光動漢儀舒化日於中天湛露恩於春酒

臣某叨承睿鑒久侍瑤階備位秉鈞何補馨香之治捧觴上壽永膺億萬之年式如

中書省賀尊號皇帝壽八十表

伏以廣二億而輪二億萬方歸一統之尊春八千而秋八千六葉開大椿之首稽之載籍曾未前聞恭惟憲天述道仁文義武大光孝皇帝陛下德本至仁天申純嘏繼一祖四宗之業兼三皇五帝之功燕翼貽謀動從民志以太孫撫軍而重安國本以新河轉漕而通惠畿民

建大學而首善京師清中書而杜絕羣枉緩回鑾輅省
秋斂而即田功丕顯前光纂武圖而修信史惟聖神之
廣運納福壽於方來神萬屢聽於三呼錢祖莫多於八
百顧茲鉅典稱慶宜先況盛事之難逢幸微生之親見
臣某等職司蘭省喜倍輿情順考百王實光千古翰誠
報上區區歌天保之詩以億祈年永永同洛書之誦

又

伏以王正紀月萬方歸一統之尊神筴儲祥八秩啓無

疆之壽况得春於上日協正氣於四時事盛來并禮須
交慶恭惟尊號陛下誕膺景命祇紹炎圖載續三代之
英創作一王之制繼天立極躋世於平化行鯨海之南
威暢龍廷之北廓廓然可謂無事巍巍乎其有成功方
且與富藏民舉免積年之負方春布德肆頒咸赦之恩
宜壽祉之方隆見嚴恭之克享端臨元會光動皇儀舒
化日於中天湛露恩於春酒臣等率先列辟拜舞稱觴
久侍台階何益體元之政願言洛誦永符垂億之年

聖壽節表

伏以日符協夢茂隆探策之祥鳳歷周星方啓同天之
運休徵滋至海宇交懽

中賀

恭惟尊號陛下帝學日新

聖謨天縱恢章先業垂裕後昆所欲從民爲天立極以
太孫撫軍而重屬世望以新河通漕而倍溢民儲建國
庠而首善京師清中書而杜絕羣枉方翠鑒之回軫慶
玉燭之調元敬展賀儀載臨誕節臣某等承乏鼎鉉同
秉國鈞愧無金鑑之書徒切露囊之獻光瞻北極列衆

星環供之先壽等南山伸天保不騫之祝

翰林院聖壽節賀表

伏以翠鑾回軫屬千官飲至之秋玉燭調元慶萬寶登

平之歲載臨誕節煥舉賀儀

中賀

恭惟尊號陛下內極

文明外昭桓撥爰從登極之初未嘗以位為樂思章先
業垂裕後昆燕貽謀而以之撫軍清中書而俾之端本
于以息肩中夏謹度侯藩上禱下祈為民斂福東征西
伐與世除殘文軌一家而不曰治安者乎煙火萬里而

可謂和樂者也尚覲惟新之政擴推不忍之仁包舉遐
荒涵濡聖澤臣等叨居辭館榮列士林敬奉寬觴俯仰
虎拜敢希金鑑之誠仰罄神嵩之頌感生北極歌有商
長發之祥壽等南山罄天保不騫之祝

謝授翰林學士表

臣憚言今日日蒙恩除臣翰林學士者伏以求賢圖治
遠邁哲王養老乞言誠為重事况聖代方文明之盛在
禁林有超逸之才如臣者學術素疎桑榆垂晚俾擢升

於衆上殆選有於無中茲蓋伏遇皇帝陛下聖敬日躋
文思天縱紹接千年之統光揚列聖之徽舍所短而就
所長小成小而大成大敢不凝思螭首益礪辭鋒由外
臺而登玉堂固已極當代縉紳之寵約舊章而修信史
何敢企高天日月之輝

登寶位賀表

伏以承祧主器已欣歷數之歸助順興龍允協神人之
望事光前古運洽重熙欽惟皇帝陛下皇祖聖武之曾

孫明孝太子之嫡嗣英武同符於先帝溫文早著於春
宮扈蹕東征躬勤備至撫軍北邁我武惟揚符命自至
而呈祥宗盟樂推而同戴既深丕春所助宜多覩大寶
之昭升將兆民之永賴中統至元之治行見增隆漢文
夏后之賢莫之獨美光融化日歡沸民謳臣某等久事
先朝備位政府再逢嘉會喜邁輿情景命維新按軒厯
上元之統太平假樂稱瑤階萬壽之觴

老人星致語

伏以太平有象治洽金穰至德無方文綏武暢惟精誠
之上感致淵曜之輝臨臣遠自孤南光融狼北龐眉鶴
髮月帔霞冠遽踰常度之躔來展流虹之慶恭惟皇帝
陛下玉帛萬國庭衢八荒紹列聖之垂休圖舊人而共
政幾先物而聰明齊聖量包遠而恩澤無遺敢憑出丙
之微明用表後天之遐筭咸躋壽域樂對昌辰南極何
深下坤維七十五度北辰伊邇拱乾位億萬餘年爰奉
徽章式申善頌其辭曰天地穹蒼一氣氤祥開來表帝

皇真九圍覆露堯天大萬有榮懷湯德新報上疇非思
下下推恩及物自親親通明殿裏長生奏願祝元貞萬
萬春

中書左丞姚公制

朕聞世祖睿臨之久有文王多士之稱如種稂莠而備
梁棟之材如積璫璵而供瑚璉之器而况先朝故老當
代名臣良用慨然想見風采故中書左丞姚某生稟淑
質世稱大儒爰自潛藩殆若神授天扶道統力主經筵

以聖道而覺斯民燭天理而息邪說智足以達其言行
辯足以濟其經綸耕桑開王業之艱征伐佐雲南之舉
罷侯置守轉官之制初行論道經邦建極之功斯在是
用圖回左轄羽翼春宮永惟佐命之勤式贊承祧之美
簫羽東序從容賢傳之嚴綸綍北門寂寞玉堂之話百
身莫贖一鑑云亡開國於營用旌直德可贈某官某謚
俯惟英爽歆此寵靈

中書左丞許公制

朕究觀世數灼見天心粵惟有不出世之君然後得大
有為之士運符千載道濟一時中書左丞許某爰自師
儒遂拜左相用之不為不重學之不為不深貞一乃心
執持苦節謀謨善斷精識造微既逢堯舜之明用安社
稷為悅君聖臣直理明道尊庶幾夷夏之安風以詩書
之教衣冠萬國雍容叔孫之儀仁義一家剴切魏徵之
諫在中統至元之治有永淳貞觀之風此其效焉功可
忘耶而復養英材於國學齊七政於璿璣白首南歸尚

深北顧憂來丘禱獻欵柱石之哀人去鑑亡瀟洒風雲
之契感時懷德想像其人忍惜卹章俾疏身後可贈某
官某諡尚期寔宥不昧歛承

翰林學士承旨王公制

人臣大節忠義為先卹典推恩古今一致故翰林學士
承旨王某道德淵深人品峻潔板蕩見忠貞之操文章
有正大之風養力息兵貽謀進諫惟軍國正撫監之體
將謳歌見厯數之歸白首匡時赤心為國庸示至公之

論曾無一己之私而又扶昌運則一代名臣鎮雅俗則
百年遺老去日漸遠有念何窮九原之氣猶生不忘宗
社三事之報斯在庶極哀榮可贈某官某諡尚冀英靈
服我休命

請上尊號奏章

臣某等言伏見陛下昭受顯號今已十年聖德神功日
新一日又聖壽新歲茂登八秩考于典禮合行再上尊
號上以贊揚功德之萬一下以罄臣子愛戴歸美之誠

謹此奏聞伏冀聖慈特賜允許表

聖壽節賀表

至元三年

電繞中樞寶厯啟千齡之運祥開彌月瑤堦儲八葉之
蓂朶在覆臨疇非鼓舞欽惟皇帝陛下聰明時乂聖敬
日躋爰從在御之初未嘗以位為樂大慶同符于漢祖
宏規遠邁於唐宗續四聖之丕圖新一家之大典尊崇
故老思致隆平委任勲賢迭居宰相文之以詩書禮樂
律之以軌度儀刑薄賦輕徭省官定制尚側身而修行

每前席以賓賢察納雅言彌綸元化上所以恢章先業
下所以弘濟生民凡曰云為務從休息分縱司而去積
年之弊更庶尹而削藩鎮之權尊祖配天妥宗祧於九
廟敷文柔遠舞干羽於兩階功德兼隆神人交暢以致
服前代所不能服臣上古所不得臣東夷航海以來庭
西域梯山而款服可謂振長轡以遠馭敬中國之至仁
仰惟極治之難名皆出聖模之廣運載臨盛旦敬舉賀
章臣等猥領郡符恩同天造進乏千秋之金鑑遙稱萬

歲之霞觴同虎拜于揚休下列阻陪於北闕効嵩呼而
獻祝賡歌載詠於南山

聖壽節賀表

至元四年

甲觀開祥嗣大厯無疆之服華封請祝罄後天難老之
期凡在壽臨率多呼舞

中賀

欽惟皇帝陛下文思天縱

聖憲日新得漢唐經國之權綱極堯舜知人之濬哲以
岳牧治本也疏之而冊授中書化源也清之以弼諧尚
兼聽以爲明每得賢而恨晚溥覃祿秩優復民田有司

荷覆露之恩含氣遂生成之樂家給人足時和歲豐九
歌莫被其神功萬事馴歸於道揆而又順長道而屈羣
醜推至悌而御多邦謂本支一出於祖宗重疏恩而立
愛江漢終歸於淵海首繼好以息民由既睦而於變時
雍以克肖而全付所覆春際八荒之壽域天開一統之
徵祥瑞屢見於蒼麟箭罷傳於青海西窮月窟率稽顙
以來王東極扶桑復寅賓而朝日繄爾至元之盛烈於
昭曠古之深仁瑞節載臨賀儀煥舉臣某等心馳魏闕

職限侯藩阻振鷺以陪庭儼天威之在上千官飲至傳
聞置酒於南宮萬歲稱觴第切瞻光於北極

兩宮正位稱賀表

伏以正位建儲舉一代當行之典推仁被化遂萬邦咸
喜之心允在臣鄰同音鼓舞中賀恭惟皇帝陛下道彰
坤順德益離明治首宮闈基隆國本著母儀於天下融
少海之波光謳歌見四海之歸教治豈二南之廣壯本
支於百世聳官儀於一時某等職忝侯藩心馳象闕徒

切煙花之想阻陪鵷鷺之行敢罄丹衷載陳封事德符
寶運拜揚稱三殿之觴慶衍蘿圖綿亘接萬年之統

聖壽節御史臺賀表

鼎定皇圖接千歲上元之統天開甲觀儲九秋盛德之
祥聲教所加謹呼斯溥中賀恭惟皇帝陛下堯文天縱
湯聖日躋爰從在御之初未嘗以位為樂躬勤儉德夢
想幽賢察納雅言恢弘治道蕩皇威於北海藉千畝於
東郊載崇列聖之鴻基仍創一家之大典漢官儀之漸

復唐治具之畢張尚深闕政之思屢下卹民之詔內祓
灾而修行外發政以施仁明德緩刑輕徭薄稅而又天
臨睿智坐折遐衝昭曠度以無前振長轡而遠馭爰整
干戈之事終歸雨露之恩雲掃黑山孰謂玉闕之久閉
春回鴨綠旋聞滄海之維清既荒外服之功尤盡內修
之理緊爾至元之盛烈於昭曠古之深仁瑞節賁臨賀
儀煥舉臣某等榮叨臺諫願切葵傾陪稱漢殿之觴仰
效露囊之獻光瞻北極罄封人上願之心壽等南山申

天保不騫之祝

聖壽節賀表

寶厯膺期接千歲上元之統日符協夢開九秋盛德之祥稱慶惟均際天所覆

中賀

恭惟皇帝陛下離明繼照

乾健乘時動順民宜更張治化求懿德而式序爾位任吉士而勸相我家尚深闕政之思屢下子民之詔去網更仁於湯祝敷文思格於苗頑既荒外服之功尤盡內修之理卜營督亢宅壯陪京據山河全勝之區得貢賦

適中之地于以隆上都而觀萬國備時巡而禮高年四
聰達羣下之情一豫為諸侯之度臣某等榮叨郡寄心
切葵傾阻稱漢殿之觴徒效露囊之獻運鍾北帝祚有
商長發之祥壽等南山申天保不騫之祝

御史臺賀正旦表

至元八年為
御史時作

伏以鳳歷頒春三正協夏王之統鷄人唱曉萬方稱漢
殿之觴品彙冲融衣冠環拱恭惟皇帝陛下容德乃大
盛蹟無前載新出震之權端履乘乾之位東漸滄海高

麗蒙再造之恩西極渠搜葱嶺多來庭之使國字創一家之制朝章舉曠代之儀方漢之險何足恃乎高深蓬萊之波旋復聞其清淺終格羽干之舞始奉文誥之辭咫尺天威趨承鳳闕蕩恩光於萬里醉春色於九重臣某等久侍瑤階叨居憲府獻可替否詎能振臺閣之風拜手揚休仰以祝河山之壽

正旦賀表

伏以玉燭調元瑩英啓堯堦之厯椒花獻頌錦封陪漢

殿之觴朝野同歡乾坤交泰中賀恭惟皇帝陛下仁涵
動植德備廣淵受藉以朝履端於始爰體春王之月屢
頒寬大之書顧軫慮之洪深躋吾民於仁壽而復開明
堂而坐治奉帝籍以躬耕總攬皇綱務茲大本鳳城斗
轉春回萬里之農桑紫禁天開瑞靄兩都之雲氣臣某
等叨承列郡遠被恩光敢俯傾葵日之誠仰以效華封
之祝遙瞻北闕天威咫尺之臨壽等南山神筴授萬
千之筭

史都督讓總管表

臣謹言推賢以位敢希高世之名以讓移風固有為邦之教志雖自信政亦當然

中謝

伏念臣某等鷹犬微材

邊防舊帥起家燕地分土恒陽累朝荷眷遇之恩報國乏忠貞之效正以先臣之故久膺方面之權崎嶇提陽夏之師屯戍控荆門之會仰憑聖筭十載無虞鎮守長江寸功何有比加寵數方驚都督於諸軍恭被朝章俾襲天倫之舊物君命凜雷霆之重微軀處伯仲之間情

有難安禮宜遜讓臣兄某灼知民事素秉忠心功收製
錦之能政治承流之體如黃霸已優於治賴何景宗遽
可以臨民伏望聖慈鑒臣愚悃非敢圖私己之便實恐
貽不友之譏念念天恭敢後周書之誠堂堂大國務先
棠棣之風謹拜表以聞

聖節望闕祝文

龍馬授圖已肇興王之迹流虹啟聖大開彌月之祥
居覆載之間疇匪懼忻之至欽惟皇帝陛下聖謀能斷

睿智足臨天祐人歸功崇業廣西平大理蘇雲霓徯望
之心南渡長江得風日清明之助爰履神明之祚恭承
祖考之休榮示至恩以昭曠度親王昆弟光輝棣萼之
樓異姓勲臣揚厯金華之省尚求賢而若渴每從諫於
如流所期無曠於庶官急欲廣聞於民瘼禮百神而餼
福順三時而務農載戢干戈俾安田里施仁發政先困
窮無告之人講好息民停邊鄙喜功之奏而又兵民並
政惠愛同行鑑古昔之安危立規模於宏遠移官吏而

除累年之弊崇儒雅而興文治之風尊京師而強幹弱
枝削藩方而如臂使指分宰相於諸道專委任而責成
功置統軍於遐陬蓄精銳而消外侮唐世之時雍不變
漢家之治具畢張以致祥風扇和時雨霈德炎洗蠻邦
之瘴春回沙漠之寒車書八方洵曰治平者也煙火萬
里可謂和樂者乎民歌德化之誠心靡帝功之有當萬
寶秋風之節適羣龍首出之辰湛珠露於仙盤蕩金風
於玉宇香鬱三山之紫霧懽騰太液之蒼波吉旦光臨

溥天同慶臣等叨居民部阻奉壽觴不勝葵藿之誠仰
荅乾坤之造遙瞻北闕天威建咫尺之臨拜祝南山神
筴授萬千之壽

十六年賀正旦表

任河南河北
道提刑時作

玉燭調元允協三朝之始春城回斗茂凝一氣之新正
朔所頒邇遐交慶欽惟皇帝陛下端臨左个誕受輿圖
仁擴春寬道開時泰化日舒而民力足奔鯨沛而海道
空清明際區宇之間鼓舞樂雍熙之治尚惟事統丕顯

聖謀孜孜下達於民情念念化隆於邦憲保釐荒服減
吏冗而益監司惻惻長征數軍實而免貧役功極見寢
兵之漸策長盡馭遠之方履茲肆覲之辰介以如山之
祝臣等欣逢盛典叨領外臺政罔肅於簡花禱徒伸於
椒頌遙瞻宸極阻奉觥觥夢聽鈞天霑露恩於春酒對
揚休命祝聖壽於南山

聖壽節賀表

至元十七年
八月初二作

秋滿皇都荷大駕省方之豫祥歌長發屬千齡應運之

辰夙旦載逢儀章煥舉恭惟皇帝陛下聖惟桓撥智足
睿臨用式九圍大開一統爰念盈成之戒每深覆燾之
仁挈彼生民躋于壽域兵刑寢措收帝王之極功基業
恢弘光祖宗之丕緒儲此無量之福有來滋至之休繄
爾大元於斯為盛臣等叨持使節遠達天威雖微金鑑
之翰誠敢後封人之願祝盤銘至再天心享一德之新
嵩呼者三聖壽永萬年之筭

進瑞芝表

皇帝聖旨裏臣某等言於所領汲縣界內今月某日陶
工朱良舍中產土芝一大本者伏以至和太來嘉貺昭
應爰念開先之兆聿彰承順之祥臣等誠惶誠恐頓首
頓首欽惟皇帝陛下政治慈仁故事耆舊聖惟廣運惠
澤春融德合無疆瑞草英發彤枝韡韡合為連葉之芳
紫蓋煌煌夔出銅池之秀木樛漸稱於弘景郊歌美並
於班書以茲玉質之奇特著吾皇之壽適迎誕節恭覩
殊姿臣某等無任忻抃慶賀之至謹具表進獻以聞臣

某等謹言

甲申歲正旦賀表

山東
憲司

伏以齊七政于璣衡統允協於夏正受四海之圖籍喜
大溢於周邦香翻白獸之尊光動黃旄之仗恭惟皇帝
陛下敷臨神筭武定文綏體元建極於中天顓任責成
於諸相惟德應上天之眷遂運開一統之祥宴錫彤弓
樓畫玉闕之使塵清滄海暖回陽谷之春歷觀往代之
規模未見今日之全盛尚軫憂勤之念屢頒寬大之書

便民之詔以次舉行煩民之事悉令革去廓廓然可謂
無事巍巍乎其有成功臣某等幸際鳩辰敢陳椒頌遙
下肅雍之拜如臨咫尺之威紫禁紫花夢想鈞天之奏
華封獻壽祝同嵩岳之呼

聖壽節賀表

伏以氣調玉燭開九秋大有之祥露湛霞觴獻天子萬
年之壽賀儀煥舉海宇同懽中賀恭惟憲天述道仁文
義武大光孝皇帝陛下立賢無方從諫弗咈畏服得所

臨之道威揚極載績之功平內難而以義滅親停遐征而敷文柔遠而又政歸一相事革多門永言夙夜之思大得股肱之助臣某等忝膺郡寄密邇天顏歌天保以歸休阻陪駕列罄華封而願祝竊效嵩呼

千秋節賀牋

至元十八年六月

運炎烏火見上天於穆之休

一作皇天眷命大間一統之基甲觀呈祥適際誕彌

之帝降玄商適長發其祥之月千秋稱慶四海攸同欽惟皇太子殿下德粹元良道隆純孝允當楚璧歷試堯

難未明問寢於龍樓思治望賢於漢苑日深子愛時御
經筵擴推不忍之仁陰作無量之賜而又維持臺憲以
振朝綱左右端人圖惟國政雖一事仰資於聖斷致兩
宮咸得其歡心以茲中外之情顯切撫監之望某等內
塵法從外領雄藩恩深少海之波濶躬侍春坊之劔履
玉卮奉壽陪鳳舞於西池鶴禁揚休等嵩呼於北闕
玉卮獻酒奉鳳舞於西池
寶緒分輝俾壽昌於北極

上經略史公啟

壬子年三月十七日門下王某謹齋沐頓首百拜致啟
于經略相公閣下右某言乾坤草昧建諸侯所以濟屯
茅土分封惟大人為能開國仰佐龍飛之運須資臧降
之賢擬議以言非公孰可洪惟經略相公閣下器兼文
武運偶經綸衆推為上將之材自任以天下之重攀麟
附鳳早依日月之光捧轂推輪榮受干戈之命萃一門
之忠孝兼五路之侯封終始四朝險夷一節仁溫溫乎
冬日氣凜凜乎秋霜內蘊一誠外含萬動推而行陣則

勇大敵斂而康濟則澤被生民顧所遇之如何必其
材之相應鷹揚虎視收中原百戰之勲蘭婉芝芬靄漢
將千金之譽既備過人之智故多及物之功綏斯來動
斯和存者神過者化紅蓮綠水盡借籌入幕之賓長劍
危冠皆扛鼎蒙輪之士謂蟻穴尚干於天討詔龍驤暫
駐於遐陬旌旗未指於淮壖草木先聲於江左虛懷下
士宜平原賓客之三千不戰屈人切充國便宜之十二
雖閒曠不忘於武備一周旋志本乎儒風詩書鞍馬之

間談笑風塵之外又且脫屣示讓在人所難當諸郎勝
事之初乃一旦奉身而避弃壁而負其子林回雖近於
人情捨己而與諸人季札蓋存乎教典方慶懸車之樂
復承顧命之榮乘駟而超天河以腹心而參廟筭增
輝白日叶贊明時力障羣陰春回華夏試手已安於漢
鼎阜民共拂於薰絃柱石之力初不讓於霍票姚股肱
之貞豈復減於蕭相國而又量容江海利先國家顧所
收之邑委以不爭蓋先見之明知其有在果展斗間之

紫氣卒收度外之鴻名知其褒有成忠荐膺渥眷復衛
邑為之湯沐豈偶然哉錫康侯至於庶蕃固所宜也望
符輿議歡動百城顧茲襁負以偕來實出恩威之素著
僉曰惟昔有虎苛之政子今無犬吠之虞一新污穢之
風共沐神明之化出幽谷而遷喬木孰不快哉若大旱
之望雲霓俟斯久矣此共推於公議匪獨出於私心今
衛勢據上流土名沃壤衣冠之所出風化之所生奈何
民陷死者積年政弊極之有日治期清靜無如罕牧之

良俗久浮佻宜審急先之務况仁深改革意切矜憐固
非賤予之當陳諒以愚衷之所激伏念某三尺微命一
介書生慚非適用之才素負讀書之志無繩以繫白日
昔年甘落佩之遷披霧而覩青天今日有彈冠之慶且
平昔想聞其風采况終身得為之主盟為喜可勝所憂
一寫聞風興起已空北海之濱杖策來歸獨愧南宮之
謁儻預蒙於剪拂庶得免於駕駘所願無他其心止此
借齒牙之餘論煦枯槁於寒鄉燕麥兔葵尚冀春風之

搖蕩鼠肝蟲臂敢逃大治之爐錘庶將螢爝之微仰賀
風雲之未過此以往不知所裁某頓首再拜冒瀆尊嚴
不勝戰慄之至

上姚敬齋啟

中統元年七月六日席生王某謹齋沐頓首再拜致啟
于尚書宣撫先生閣下伏審九天頒詔側聞方岳之分
臨四海嚮風喜見太平之有自顧惟孱劣曷勝提撕况
朝廷方弘治之辰而州縣以得賢為急須獲玄德升聞

之士可副大人吐握之懷如某者稟性疎愚與人朴直
斷無它技徒切休心爰自穉年特乖庭訓雖讀書鄉曲
謾攻童子之雕蟲及學道蘇門徒竊孫登之吟嘯因沾
餘溢得列諸生然固窮不輟於絃歌念來事可為者忠
孝吾將仕矣未見其人蓋女為悅己者容士為知己者
死俄瑤翰光臨於圭竇見先生樂育之素心為喜可勝所
憂一鴈何乃至於此蓋有激而云身賤貧而處世無聞跡
泥塗而遇知為貴若夫燕築臺而師郭隗豈天下之無

人備奉命而奔孔融所喜世間之有己將摳衣於不日
終滙膽以謝誠伏惟閣下學際天人材兼文武幾年潛
卹一變經筵儀表四方股肱元聖方棊間捷偉謝安雅
量之雍容抗表出師見葛亮忠規之遠大以致佐命收
奇功於六詔除殘償封豕於三秦盪平青海之波濤補
就蒼天之日月方冀馬空於冀北首令詔撫於山東杖
扶戴白之疲癯春動百城之草木欲隆承流宣化之權
故擴併採兼收之路慮一夫之不獲念小子以何堪戴

德若天疇恩無地比遂掃門之役庶堅磨鈍之情利一
割之鉏刀享千金於弊帚嗣知短鋤敢圖運海之鵬程
言至再三恐辱知人之藻鑑過此以往未知所裁

上張左丞啟

中統元年六月日衛人王某謹齋沐頓首再拜啟事於
中書左丞宣撫相公閣下欽聞明詔來鎮雄藩凡在提
刑咸增慶抃謂天下大統也尚建侯而不寧初無中外
之限方岳至重也惟得賢而俾乂故咨帷幄之臣然念

德非盛大不足以鎮壓夸毗量非弘深不足以包總細
大才非經綸不足以酬事變望非崇高不足以饜人心
恭惟閣下德富天彝才為世用望出中朝之勲舊量涵
萬里之汪洋兵濟長江符羊祜抗章之志龍興代邸偉
宋昌獨斷之能故得雨闢雲開陰消陽長雷霆驅號令
之威朝野擴網維之治繡衣南下實承流宣化之權蕭
斧西臨正摘伏破姦之日而今況河朔數路懷衛兩州
世官有晚唐擅據之強風俗近天寶塗炭之苦穢彰隣

邑政出多門其為害也權在吏胥之手賄甘黠傑之心敗類者能先去之善人者其自存耳以聖世求直言之士故愚儒及舊政之非伏念某一介布衣半生文吏顧其時之可出念所學之無窮北闕上書愧乏馬周之志南山種豆每懷揚惲之風觀化明時游心至道不求鳴於時相終混跡於常流少得見知侯喜顯名於韓狀如蒙所請曾黜終老於孔門過此以還未知所措

授翰林學士同知制誥兼充國史院編修官謝

中書省啟

中統二年秋七月廿九日王某謹齋沐頓首百拜奉啟
事于中書門下伏以幼學壯行乃吾儒之常事位尊德
薄實君子之深憂况禁林乃清切之資而自昔極人文
之選如某者性資樸魯學術靡蕪幼窺篆刻之文稍服
鯉庭之訓而藏修蔑有其素徒佔畢不去其心血指汗
顏竊弄柳州斤斧屬辭比事略窺左氏門牆賴鶚薦之
先容致囊錫之立見幸遇鴻熙之世來觀上國之光自

嗟坎井之蛙日侍幕蓮之地時乏駿足用駕馬以代馳
筆悞素屏點蒼蠅而成質方退南飛之鷗重留西掖之
垣几筵預使席之榮行李致館人之意念朱雲之恥吏
哀王孫而進飧顧影自怜捫心有託特以見知之厚遇
不無立仗之長鳴苟丐虛名盡光歸路豈意誕膺綸命
峻陟文階忝分蓮炬之光得與玉堂之選固不能奮陽
城之觀望無乃自郭隗而權輿儘不負十載夜窓燈火
之勤足以瞑九原先子之目其榮已極夫復何求茲蓋

伏遇中書相公閣下柱石中朝風雲潛邸羽翼四人之
勲業文章兩漢之精華秩乃代天門無弃物父子傳溫
國之學書史備鄴侯之籤公將權衡彼自為之高下信
如寒暑卒皆遂於生成豈謂悵懷蔭及蕭艾某敢不勉
修士行恪守官箴仰酬雨露之恩俯答丘山之德蓬蓬
運海固敢期九萬里之程碌碌因人庶不在十九人之
後過此以往不知所裁謹奉啟事以聞王某頓首再拜

青詞

齋意

早氣隆蟲歷三時而已遠守臣惶懼顧大責之難逃輒
先穀雨之辰敢罄零求之懇預期以告於禮則宜

祈雨青詞

恐懼自修災有可消之理敬誠斯在天無不饗之心伏
念臣憚素昧臨民叨承總寄每荷登穰之惠庶寬撫字
之憂爰自去秋迄于今歲風霾遂勃生意焦枯時疫大
興秋種未下氣將交而寒薄雲已合而風醜既走郡祠

載呼洪造恭輸至懇光啓靈壇集道侶於琳宮宣琅函
之真誥伏望九天降監列聖垂慈分勅山川之神普下
雷霆之詔風災一返膏潤咸霑使春事無訛喜動四郊
之耒秋成有望歌賡高廩之詩臣無任瞻天望聖激切
屏營之至

祈雨青詞

伏以萬物盈於兩間亭毒必資於帝力皇天祐于一德
高明庶格於精誠比者時雨愆常秋種不下重念無辜

之衆將罹飢饉之災用是罷將作而弛土木禁市酤而
重餼糧循省自修冀回哀春氣將交而寒薄雲既密而
風飈適當龍見而雩爰致桑林之禱恭延真馭崇建靈
壇伏望列聖垂仁九天降鑒易陰陽之恒數幹運化之
玄機下勅豐霽霈流甘澍蘇槁麥於南畝播嘉穀於東
郊一滌風霾溥含生意豈惟大賚三農免失業之憂嘉
與多方高廩享有年之慶

祈雨青詞

天地乃萬物父母忍饑饉之荐臻風雨為一歲咎休顧
得失而與應念守臣之不職致春旱以為災終風且霾
種不入土近雖霑其濡潤終未至於滂沱二來就枯羣
情懷懼念鰥寡無辜之老有溝壑立至之憂既走郡祠
載籲玄造滙愚衷之至懇建雨部之靈場伏望真宰鑒
臨高穹陰騰溥同一視之仁大霈如膏之澤興嘉苗於
四野際和氣於兩間庶寬轉側之勞共慰僭竊之望所
有報禮其敢後歟

為春旱蟲災青詞

伏念天聽雖高惟至誠而能感田功未即繁歲事之可
憂敢滙丹衷仰干玄造茲者自春徂夏時雨愆期災桑
捲而步屈為災嘉禾槁而風埃蔽野吏則不德民將何
尤非恐懼以自修將蘊隆而曷已爰差穀旦乃建靈場
延致羽流恭修法供應蒼精之昏見冀誠意之孚通伏
願列聖垂慈九天降鑒俯回哀眷霈甘澤於一方丕顯
神功享豐年於高廩

齋意

伏以驕陽恒若時雨未沾嘉禾槁而耕隴如焚步屈災而春蠶闕食齋心預告於禮攸宜

為張縣尹吉求嗣青詞

伏以不孝有三身無後而為大輸誠儻至天雖高而聽卑敢瀝丹衷用干玄造伏念臣某一行作吏壯歲當官久居簿領之間未免輕重之悞或養志罔終於恃怙或臨民多靳於哀矜以致二子併亡半生惇獨自孽難逃

於陰譴隱憂忍及於先人敢資惟惠之仁爰謹籲天之
請敬陳清醮上叩高真伏望大眷垂哀憫孤影零丁之
苦維羅應夢廣一門嗣續之祥

為鄉人禱疾青詞

伏以民固多愚匪易天心之感老惟欲逸何堪豎疾之
嬰高以聽卑用伸懇至伏念臣某生居市閭長失義方
凡有作為不無過咎或營營於窺利或昧昧以馮生正
以貪癡愈深罪戾又緣移徙多所紛更穿掘既發其蓋

藏修治悞衝其禁忌以致災徵未已病日彌留和豫既乖眠食稍廢揀藥徒為之瞑眩朝昏遂苦於呻吟伏望上聖垂慈高真降祐庶憑仁覆得蒙羸劣之安言念愚衷永謹省修之戒

秋澗集卷六十八

欽定四庫全書

秋澗集卷六十九

元 王惲 撰

疏

衛輝路創修文廟疏

竊以廟而通祀國家極典禮之尊教以多方庠序乃風化之本子焉而父臣焉而君大凡日用之間無匪聖人之道既富而教以時則宜猗嗟君子之邦久曠素王之

位吏之不職孰此重焉學之不講是我憂也爰興不構
庸示教基擴前日輪奐之規啟百代神明之觀經始雖
先於一府贊襄實賴於諸公蓋土木之資瓦甍之用須
豪傑而共濟庶程度之可完仰止翬飛永鏘玉振春秋
二祀肅豆邇三代之儀衮冕而王還文物昔年之舊凡
我同盟之者即當聞斯行之謹疏

大成殿上梁疏

伏以起百年之廢不渝乎素心合四境之人用扶其修

棟凡曰有生之者孰非吾道之中功將底以落成衆能
無於小助况鄉校丰讀書之子而師帥舉稽古之流重
瞻卬衛之文久被絃歌之化推求治本一出儒宗敢紆
長者之車來聽兒郎之偉謹疏

重修衛州蒼谷山廣施王廟疏

伏以民所欲而神必從宜深乎報神有享而民乃主否
則疇依顧維明神爰處蒼谷司分兩部權控龍威時惟
曠乾禱輒靈應且王號已昭於舊典而秋恩又見於新

條比者祠宇年深橡楹日圯塵昏畫像慘雷轟電掣之
雄瓦落宮牆動木老雲荒之嘆今將上完霧棟旁奕蒼
池及時瞻山雨之來闔郡享豐年之賜神報久已豐矣
公等宜何如哉謹疏

隰州蒲縣重建嶽廟臺門疏

伏以鐵鳳翔雲固神棲極於壯觀銀臺墮墜必天廢假
於人謀春岱嶽之行宮據蒲城之古麓豐碑具述厯代
增崇雖作鎮於東方實普臨於率土有禱輒應顯化殊

常蓋幽明不測之秘神而生死總歸之魏府茲非尊奉
曷致敬恭今將大復神譙俾還舊觀計百廢以實博顧
一己而難為衆力經營厥功可俾舉蒙少助不日告成
靈威肅喬木之風雲氣動孤山之色璇題藻棟儼九天
來格之儀僚宋黎民獲三殿護持之福幸垂藻鑒請署
芳題

玉清觀化緣疏

竊以雲飛鶴舉固所去以為常火食屋居在有生其可

闢未遂山林之往所期性命之安如某者忝鄭圃之居
久滿戶間之屢慕子真之隱擬耕谷口之雲雖南鄰北
里統是檀那而凌雨震風可疎寢處為歸翼數飛於夢
蝶奈拙謀復甚於林鳩王錄事倘助於草堂庾桑楚庶
休於畏壘田園成趣平分乎二頃煙霞杖屨它時共樂
此一庵風月凡曰通方之士能無尚義之心

鄆城縣晉濟寺化緣疏

伏以建升道場不獨為天女散花之供祈聖人壽庶或

盡臣子永命之心眷高魚之北鄉迺獲麟之西鄙古瞻
勝槩地發龍光已霑普濟於明經未覩華嚴之寶界今
將百堵具舉精藍聿修需仗衆緣能成妙果道昭者雲
龕野衲托鉢者海嶠行滕卓錫得泉了此這場諸佛事
投竿在水肯教空載月明歸謹疏

請黃先生德新主善疏

三年至穀諸生忍廢於光陰一卷立師學行首明其模
範惟大治有鑄金之妙良工收琢玉之功況漢庭發策

本之明經而近代程文自有定體欲造科場之捷徑須
求事業之專門伏惟殿元先生藻發儒林道傳絕派繼
踵于黃氏三山之後探賸乎上古八索之前而又馳騁
手百家通貫乎一藝春圍陣合筆驚風雨之聲夢澤宵
吞文麗江山之秀久矣倦游之興偉哉樂育之心倘蒙
憫小子之斐狂永以為國人之矜式高懸絳帳嗣音敢
自於吾儕仰屬青衿固讓毋勞於謙德謹疏

襄陵縣重建飛橋化緣疏

伏以平水滄川依約金城之舊彩虹沉影空餘華表之
遺矧當晉秦南北之衝有秋夏泛溢之阻僧清者心存
肯綮力振前修經營者已數年奔走者幾千里每以力
微而事大懼夫始作而終衰驅石必東海之鞭洪波可
駕銜木仰西山之鳥尺喙徒勞在他邦果於義為豈鄉
國獨無至意倘垂一諾過重千金少分有限之功陰受
無量之福公私安濟免勞鄭國之乘輿遐邇具瞻復覩
河東之舊觀謹疏

追薦孤魂化緣疏

切以辭辯游魂雖著長終之變傳明滯魄深詳為屬之
文久失所依誠為可憫痛彼河南之戰重為天下之傷
血殷溱水之波尸蔽奉寧之野兵自休者已三紀祀而
存者能幾家野祭不來愁絕喪元之勇士沙場半歿盡
為亡社之餘黎蕭條蒿里之悲風黯慘棘林之老月尚
過者動繫捭之嘆况仁人同桑梓之情為所當為祭而
非謫凡吾見而知者忍不聞斯行諸故謁同盟畢茲大

事魂兮來些庶幾貴賤之攸歸心獲所安不謂幽明之
有識倘蒙金諾請挂銀鈎

上張宣慰疏

為劉進
之作

切以辱甲子於泥塗趙武有由吾之嘆轉江沱之窮鮒
昌黎云投足之勞懷古傷今而復有此進之先生文摩
屈壘心醉麟經學詩得東野之窮好學有征南之癖以
壯歲負并汾之氣幾年為河朔之遊老雖益堅空至於
屢拭白首窮途之淚夢黃雲畫角之秋思歸敝廬得甘

饘粥撫孤松而弔影望先隴以含悲具爾是逢翻然可
駕麥船惠顧一帆助順濟之風華表歸來獨鶴遂長鳴
之願伏惟使相學士閣下氣嚴霜簡名在帝心炳趙衰
愛日之輝聳吏部泰山之望爰從公議兩鎮名藩承流
已浹於河汾宣化又漸於海表去國見似之者喜同聲
亟相應之情嗚呼託子而來當竊慕古人之義請書而
去思游揚足下之名為代悲鳴爰成尺素幸念鄉枌之
舊與分鄰燭之光倘鑒私衷請題芳字謹疏

為宋儒楊從龍贖身贖金疏

切以觀軍府而釋鍾儀傳美晉侯之德解左驂而贖石
父世稱晏子之仁古則云然今亦能爾唐風雖儉舉義
則豐荆璞未逢遇和則售士人楊從龍者晉州羈客吳
會諸生念江湖當波蕩之餘得升斗遂安身之計在士
庶官寮之署當體寬恩以吹噓惠費之仁不過一譙倘
蒙金諾請署芳題

筭學士善疏

春言六藝數居衆技之先訓彼羣蒙業必專門之老伏
惟宜之先生術窺海鏡心洞神機以勾股而測高深極
乘除而推盈縮挾此九章之妙屢為一卷之師倘許光
臨豈辭擁篲口傳要訣同趨開悟之方手筭萬籌庶無
倒顛之誚謹疏

為刊字醵金疏

汲郡志者發明潛德豈惟鄉國之賢關繫民風庶見古
今之事為書者凡一十五卷計字數近六七萬言欲廣

其傳必錄諸梓惟是閒居之久苦無力量之多凡工費口糧倘蒙少助雖夜光明月不為暗投公等自優為之我正賴有此耳謹疏

太康縣新建忠武史公祠堂疏

伏以臨危脫難無深骨肉之恩報德靡忘莫重春秋之祀惟太尉忠武公曩分帥閬東徇京畿擴仁心而斂兵鋒招拓城而降陽夏繼來臨戎尤盡撫綏雜耕無相擾之私按堵享維新之樂百年父老廕自餘休三尺兒童

慶延史氏今將啟神祠於舊里昭大德於新邦某等雖
經始於一時敢獨專其至美庶憑衆力易見成功具我
時瞻要擬甘棠之木眷言遺愛豈惟墮淚之碑凡我同
盟請題芳宇

秋澗集卷六十九

欽定四庫全書

秋澗集卷七十

元 王惲 撰

疏

衛輝路總管府重修帥正堂疏

伏以聽共民事必先處所之安絡繹星軺無匪王人之
重顧衛輝之公署實民庶之具瞻起蓋年深疏陋日甚
飭傳舍固為微末論總治此則本根今將重構一新增

光六縣俸稍先輸其兩月餘力須藉於衆官勢惟乘其
一時工可就於不日清香畫戟雖云都尹之居聖節公
筵永祝皇家之壽敢祈同志各署芳衡

樂籍殷氏醵金疏

量珠買笑空憶當時餬口為生重過故里李弄玉幾年
西邁杜秋娘未老東歸戴瞻光祿池臺總是舊遊桃李
樂籍殷氏者名香佳麗天賦芳溫曾將兩字風流占斷
八州煙月此日紛華都識破向來心事欲誰論鳳凰臺

上有伴吹簫鼓笛塲中何堪弄色惟行丐歌姬之院且
少分隣燭之光萬水千山得得來一瓶一鉢垂垂老桑
間游女固能憐暮雨之詩芳草王孫尚不棄春風之面
倘霑餘潤儘富歸裝多寡隨宜以疾為妙謹疏

李府君建碑醵金疏

故汲縣長官李公天祥素負義襟號稱能吏急難多國
士之風宰邑有桐鄉之愛去世能幾日有家為一空短
碑卧草未覩瑤鑄孤壠含悽豈勝冥感凡曰相知之舊

能無墮淚之傷庶少分魯肅之困共建此陽城之碣
言故里永賁幽光

請靳顯卿山陽闡庠疏

切以嬰孩教子責在父兄詩禮傳家必資師範伏惟顯
卿學師性資純厚賦業優長規模有乃岳之風句讀得
故家之習久訓蒙於柘里今閒處於山陽煩於白杜之
間載闡青衿之教邑雖十室使盡為忠信之人喜動七
賢不負此風煙之勝恭惟短疏具列同盟

重修泰山廟疏

伏以物有生死維岳主司事至式微須人興葺瞻新中之左地儼泰岳之行宮當年廟貌壯麗有餘此日高廟摧毀無幾賴陳將軍之果毅曹鄉老之經營一備餼糧一鳩工役周垣已興於百堵正殿將復其五楹度其工之實繁計所費於不少若憑衆力可見成功喜車馬風雲使降臨之有所官僚戶庶獲福賜於無窮謹疏

重修河內公廟化緣疏

惟公德並羣哲材優四科為邦致三善之稱折獄有片
言之譽顧瞻喬木懷想其人況此蒲鄉實維舊治民淳
訟簡猶沐休風世遠祠存不忘久敬然塵昏像設殆緼
袍散故之餘草滿露壇起燕麥動搖之嘆惟夫興貴可
表尊崇凡我同盟義當少助謹疏

省齋裴先生建碑疏

伏以辭焉不愧緣景行之獨高得之無財於人心而能
悅故武昌節度同知省齋先生兩朝名士一世龍門在

鴻文大學之間有瑞錦秋濤之譽里雖稱其通德墓未
表乎豐碑眼中縫掖半門生身後殘膏丐來者知歸報
本復有望於諸君礪石劉銘庶落成於不日巍巍麒麟
之碣輝輝星漢之光匪惟裴氏之獲安誠亦士林之美
事

為耶律伯明醵金疏

伏以分財曰惠莫先調急之心見義當為切戒後時之
嘆伯明秀造漆水東丹之後右丞文獻之孫學則有餘

空至於屢為子娶婦禮尚未完急乎謀生力有不及顧同志多狐貉之列忍一家有風雪之寒少分丰宴之資可合二姓之好倘蒙薄助請署芳題

張漢臣醵金疏

張漢臣者監司故掾淇澳諸生緼袍傷此日之貧客舍嘆故人之雨心關桂玉運阻風波既久淹吏部之除未免索長安之米况臺閣半為鄉舊而燕雲古有義風哀王孫者世為尋常付裝資者日云不少舉船望惠財固

非於建封指困不難時豈乏於子敬望升水而為恩於
目下奉千金而敢忘於他時困涸能濡多寡惟命

梁彥昇醵金疏

太原人

山頽木壞永哀賢哲之萎高上坎中未遂窀穸之寔真
彼齊卿之悅傷哉季路之貧前進士太原梁公子彥昇
詩禮名家羹牆純孝思雙親而不見抱孤影而自憐秋
草淒兮恨隔於九原春露濡而履茲者二紀惟得脫驂
而賻乃能大事之襄四十萬非敢望於郭代公五百斛

庶少分於范左相凡為同好寧不興哀淇水東傾渺逝者如斯之嘆太行西望慰異鄉久客之心

大繼長醵金疏

國破家亡老作無依之客衣單糧絕誰堪卒歲之憂大先生繼長者渤海名家中朝顯貴功名富貴竟無有文彩風流今尚存黑貂盡季子之裘短布纔甯卿之氍毹黃髮高年之列奈清霜九月之寒甘窮餓而陪西山東荆薪而煮白石哀哀漂母進簞食於何難戀戀故人贈綈

袍而何有大凡同志能不興懷所願不過一金未免上
煩多士謹疏

南宮縣文廟三門化緣疏

切惟衣無袖領難以為全行舍戶庭將何自出南宮廟
學修建有年大殿既完兩序已具獨臺門而未稱在衆
意以未安須資多助之方可就三楹之勝雲煙動色歲
采泮水之芹雷霆乍驚玉振殷人之輅倘垂重諾請署
芳銜

滑州文廟化緣疏

天下之事無大小得人則興郡國之學由古今似緩而急蓋庠序乃禮文之地而絃歌為風化之原繁爾侯邦號稱文治載瞻清廟有乏宏規廊廡卑棲狹僅容拜宮垣頽圯高不及肩我將易故而增卑衆欲妥靈而揭敬輪奐動泮池之藻丹青一繪事之新審致大成需資多助垂旒委佩復閭閻侃侃之儀趨事赴功得磊磊落落之彥賢使君業為倡率同僚屬理當贊襄毋吝援毫重

書所諾謹疏

鉅鹿縣講堂化工疏

粵惟大陸實曰古任創興釋菜之宮舊有明經之室年
深疎陋日就傾危今擬修崇務敦風化大弓長劒其備
可忘三綱五常匪學不立稍聽一丁之諭將成百室之
歌敢仗斯文共成勝事謹疏

為周府君立碑醵金疏

伏以起千年已廢詎能忘利益之恩顧喬木而言尚未

覩麒麟之碣故江淮都轉運周侯除興義重撫字恩深
公雖云亡德其可後今也有銘不愧墮淚無從惟斲石
而為特書可於公而見不朽庶圖少報永振休聲凡我
同盟共成盛事謹疏

汴梁路相國寺化工疏

汴梁路大相國寺住持僧柴某欽奉聖旨修葺前殿所
有化疏合行開具者伏以梵宮盤鬱無踰相國宏規傑
閣歸存猶是李唐遺構浩劫黷浮雲之衛秋風動喬木

之悲顧二三之殘僧將修完而何力幸蒙睿眷尚賴人謀況有生趨向而孰非善心在稽首皈依者當體上意能傾心而樂施或分囷以捐金同新般若清光與復天人偉觀風鈴如語響泛潮音天女散花有來衆士祝延聖壽載緒貝葉之香翊贊皇圖永此彌盧之固謹疏

請陶教授主善疏

竊以擇師教子孰無希驥之心傳道解疑須藉鑄金之手况木非操則無自圓之理玉惟斲則就成器之名伏

惟主簿先生經明行修學博才瞻聞望素高於儒館淵
源遠自於顯軒講論造精一之微文辭知古今之變惟
是青衿之子常瞻絳幔之儀敢瀆師嚴再新函丈心專
志致深傳體用之方日就月將最切後先之序以茲誘
掖庶正斐狂所有束脩開呈於後

重修開泰寺大功德疏

伏以道不遠人善無先於利益物興有數勢須藉於英
豪迺眷燕山昔為遼府開泰禪寺者爰因鄴第建自樞

臣雖復兩朝之增葺何堪雙樹之蕭條如聲色香味布
施能圓則上下虛空何修不可伏惟參政相公才優鞭
算義重規為禪叩愚機派沅臨濟遠暢神通妙力幾開
方便法門莊嚴已擴淨慈天庇廕證明羅漢夢況茲金
粟影歸爾古精藍雨花翳空得還舊觀登壇判斷重振
玄闕盡刮衣盂已是多餘香積飯有來福德何嗟不到
佛如來載經載營同心同德永拱寶祚為國拈香

前進士李舜臣姪求子婦醵金疏

切以燕雲尚志情深友義之懷婚媾及時詩美桃夭之
詠前進士李公舜臣之姪元德為子求婚納徵有日奈
囊空而羞澀須力濟於英豪或求幣以相投或青鳬而
見賜迓續先人之肩配合二姓之歡如種玉而獲珪璋
在貧家而得箕帚豈曰小補實荷鴻私兒女債還敢云
遂尚平之志簪纓顧恤庶幾接仲郢之風請署芳銜用
昭金諾謹疏

銅臺阿丑石氏疏

年方破瓜在故里樂籍者凡四年今嫁李氏相得甚
懽辛巳春於良家來見酒間叙話心事追念舊遊蓋
廿有二年矣且有滄洲之行求余言為重因書此以
付

去國暮年見似者而輒喜改圖故步念此意之可嘉銅
臺石氏者穠艷呈霞髻雲綰綠白雪擅郢中之曲絳羅
捲薛氏之窓玉秀蘭芳風尖月細荏苒四年之塵土稱
量幾斛之珠琲悔失此身得逢佳配回金沙灘頭之夢

吹碧桃花下之笙。顧自憐度日之難。未免有當壚之役。
試看長樂坊頭雪。猶曰春風醉裏香。將安排老歲生涯。
預准備藥壚經卷。已蒙重顧來謝。鈞慈滿地流錢。共說
平生鞭笞了。投竿在水肯教空。載月明歸。謹疏。

饒州路創建書院疏

前泉州路總管推官朱淮故太師徽國文公嫡孫今擬於
饒州路擇湖山勝地創建書院中起文公祠堂教誨子弟
奉承香火。上祝聖壽無疆。次為宗族朋從續考亭道脈之

傳伏望公卿士大夫喜聞樂助庶資衆力克遂初心者
伏以明經傳道深有賴於後人圖報起祠必資成於多
士況在曹玄之列當膺倡率之勤恭惟晦庵先生學貫
六經名高諸子始焉講學克紹程張之緒餘展也成功
直造孔顏之堂興發揮義理昭若日星沒未及於百年
道大行乎四海凡曰進修之者孰非沾溉之餘方國家
之右文宜天下之通祀迺眷餘杭名郡未瞻遺像清光
聿修香火之新祠爰擇湖山之勝地計所需而甚廣嘆

獨力以難勝少分涓滴之餘波同濟經營之盛事絃歌
不絕敢云家學之有傳俎豆斯陳庶使宗風之罔墜倘
蒙金諾請署珍銜謹疏

榜

張氏秋香館酒榜

伏以三尺紫簫吹破金臺之月一竿青旆飄飄淇水之
春孝先張君系出豪華長居紉綺壯狃五陵之裘馬老
尋中聖之家風左顧東城名香新館雖借作育蘆之地

已大蒐破敵之兵瀧春溜於連牀貯秋香於百瓮與同
至樂任價寬沽罄翠罌銀勺之歡是非何有聽白雪陽
春之曲風月無邊信不比於尋常莫等閒而空過任使
高陽公子從他宮錦仙人爭貫金貂紛摩鰕珮繫馬鳳
凰樓柱掛纓日月牕扉白骨蒼苔古人安在流光逝水
浮世堪驚况百年渾是者能幾迴一月開口者不數日
忍辜妙理也作獨醒莫思身後無窮且鬪尊前見在那
愁紅雨春園繡幕之風來對黃花共落龍山之帽快傾

銀而注瓦任枕麴以藉糟只空工部之囊扶上山翁之馬前歸後擁盡日而然

約

林評事花約

伏以良辰樂事雖曰難并旨酒嘉肴豈容獨饗茲者小園竹木粗有堪觀故里賓僚可陳一宴忍教康節獨擅花時敢擬右軍同修禊事伊誰有語花枝羞上老人頭來日無多此樂莫教兒輩覺玉盤濯月已煩竹裏行厨

繡勒攢香暫簇花邊駿馬擇於今月二十八日就樊圃
聊備芳罇伏望羣英早垂光降

茶約

伏以歡情漸減豈任杯酌之娛老境相宜正有茶香之
供今策勲茗盃集勝薰爐須分旗葉槍芽選甚鷗斑螺
甲破紙帳梅花之夢參老夫鼻觀之禪要追陪七椀家
風共消遣一冬月日勿謂淡中無味且從靜裏著忙老
懷自嚮故人多此樂莫教兒輩覺我今首倡盟可同尋

湯饗松風已減却十分酒病日拖竹杖長行攜兩袖香
烟顧此間思咸歸歡樂謹約

禊約

四序節氣春極和而季月為之盛故古人因三日盛時
而為元巳之節然鮮克與已相會今歲茲辰適值癸巳
又一盛也用是約二三知友讌集林氏花園所有事宜
略具真率舊例各人備酒一壺花一握楮幣若干細柳
圈一春服以色衣為上其餘所需盡約圃主供具秉簡

續詠辨追洧水歡遊襖飲賦詩修復蘭亭故事

秋澗集卷七十

欽定四庫全書

秋澗集卷七十一

元王惲撰

題跋

跋蔡中郎隸書後

科斗書當秦有天下未盡廢而程邈易篆作隸特用便
牘削耳逮中郎蔡邕去取丞相斯大小篆為八分實秦
隸書也近觀公建寧三年所書五官功曹掾夏承墓表

真奇筆也如夏金鑄鼎形模怪譎雖蛇神牛鬼龐雜百出而衣冠禮樂已胚胎乎其中所謂氣凌百代筆陣堂堂者乎故書家評公書骨氣洞達爽爽為有神宜矣昔張長史作書多先觀古鐘鼎科斗文字遂指法妙天下不然則無漢晉已來高古氣骨不肖往年道出襄國讀宋文貞神道碑見其筆畫一一涵篆隸古意迺知其言為有徵後之學者苟志於古舍兩漢孰宗匠哉至元辛未中秋前二日同相人馬才卿觀於省掾吳萼慶之寓

舍衛人王某敘衽書

跋中興頌

歐陽公稱浯溪頌帖歲久剝裂字多訛缺獨李西臺家藏最為完好予嘗得而見之官學四方來藏魯公書甚多茲獨闕然及調官平陽會邵君和之出故家墨刻八軸蓋浯溪臨本也命兒子孺臨摹雖精氣轉索庶幾典刑具爾嘗聞公平生書五百餘石其風骨氣韻率洞洞有神如忠臣正色立朝羣姦魄褫又如元氣賦物流形

都異因其人而為變耳始秦越人探丸起死不主故常
在邯鄲則為帶下過洛陽則稱老人西入秦又以嬰兒
醫名也故評茲帖者謂閔偉發揚狀巨唐中興勲德之
盛豈虛言哉開開公偶以銀鈎鐵畫目之恐未盡善也
至元十二年乙亥歲夏四月六日卧病中書于謝帥第
之北軒

跋郎官石柱記後

唐尚書左司員外郎陳九言文

古人稱長史得草聖不傳之妙豈知真書在唐為一代

精絕所謂能行而後善走者也魯公書學氣倖造化真
楷得法多自公始郎官帖精絕為至舊刻在京兆今亡
或云淪瘞廳事址下近從曹生季衡得墨本全文蓋丞
相壽國高公故家物也老眼增明伏翫不置者累旬真
希代寶也十有三年春正月人日題於西山之讀易龕
跋手臨懷素自叙帖

世傳懷素自叙帖有數本劉御史文季云昔吾從祖河
東君所藏本最佳後有蘇才翁跋云前紙糜潰親為裝

稽且為補書不自媿其據批也有杜祁公題云狂僧草
聖繼張顛卷後兼題大厯年堪與儒門為至寶武功家
世久相傳後又有山谷楷書釋文蔡無可家故物也北
渡後觀金城韓侯及祕府所收俱無蘇杜二公題跋似
亦非長沙真筆至元辛未秋九月晦余謁左轄姚公出
示太保劉公家藏帖前三十三字亦云子美補亡按玩
之餘令人仿佛意韻盤礴於胸中者累月冬十月甲午
是日極暄妍可愛乘筆墨調利喜為臨此拙惡非所慮

庶幾見其典刑云耳監察御史汲郡王某仲謀甫題
識

題懷素草書千文後

予觀藏真大厯二年海西寺所書千文極縱橫捭闔之
狀其欲斷還連似斜復整筆增妍而不繁其減者意足
而悉備如風檣陣馬驟不可當倒冠落珮狂莫得制至
於氣凌過庭勢追張顛雄偉豪邁超於法度之外者一
一視之皆篆隸之古文耳茲本雖出臨摹精氣固裒骨

脈具在所謂雖與老成人猶有典刑十一年正月五日
風日清麗手柔筆利乘興學書覺胸中煩滯拂然從筆
端出矣

跋張嘉貞書

近攷瘞鶴銘乃知為右軍龍爪書也予所藏唐中令張
公嘉貞北嶽廟碑其意韻骨氣敦龐古怪如衝戈植劍
特龍爪遺法為正書之一變耳張公當開元初拜大將
提重兵卧護北門其氣固已雄一世矣及繼璟而相以

強敏風操聞然史臣稱公性疏簡與人交不疑內曠如也古人以書學為心畫故其筆不得不雄放奇偉象乎為人然未免夫捧心效顰也如優孟抵掌談話與叔敖俱化一一較之有不然者蓋其嚴辨有餘而高風絕塵為少衰矣戊辰中元日書

跋麻姑壇記後

平陽盧氏家藏

歐陽永叔云仙壇記有大小二本此大書者也其興寄縹渺穠纖妍麗無不可人正如覩麻姑手爪令人背痒

時不待爬搔已渙然冰釋矣魯公書大抵與元氣渾淪
千態萬狀不可端倪因其人而為變耳第記中皆懍懍
不經之事公特為書之豈王中令謝太傅文彩敷名陵
跨百代未害登東山而有高世雲霞之志也

題魯公書臧氏碑後

魯公書三原臧氏二碑所謂亂宗者作擘窠大字體端
整而頗瀟散如羽林壁壘橫天作陣勢相戛摩與衆星
爭光而色正芒寒之氣為有間耳其懷恪神道銘鋒勁

畫望之凜然挺植戈戟一一較之不無利鈍惜乎出秀
岩臨摹使千金駿足困伏皂櫪間其超逸絕塵之想索
寞無光惜哉乃知太師忠義之氣發於筆端者諒非積
學而後能也至元乙亥秋七月朔得此帖於參政李公
跋竹谿所題東坡墨戲後

竹谿書所見多矣未有若此帖之真楷蕭散者大似虞
中舍諫獵奏狀間以側筆學坡之媚耳乃知公當大定
明昌間不祇以篆隸獨步於玉堂金馬矣輔之韞櫝愛

玩亦醉翁之意也可謂真知賞音者哉

跋孫過庭書

太宗以英偉之氣陵跨百代萬機之暇游心翰墨故二王法書盡入秘府摹倣臨搨然後以牙籤玉軸徧賜諸王何好尚如此其篤臣下得不從風而靡過庭適當其時今觀此書規模步驟一宗二王得飛鳥出林驚蛇入草之勢然點畫散落往往斷而弗連蓋體具二王而章草為羽翼也東坡謂陶詩初若緩散不收反復觀之乃

得奇趣余於吳郡亦然但近代名公品題不到豈具眼
者未暇及之邪予特表而出之至元辛未冬十一月廿
四日與兒子孺童觀於京師咸寧里之寓舍時雪霽氣
清率爾而作汲郡王某謹題

跋荆公墨蹟

予嘗觀壽國高公所藏心畫水鏡知此為臨川所書無
疑雖風骨遒勁而筆勢散落無繩削可據殆似公當軸
時變新法調夸毗子青苗助役無所紀極噫一念之差

至於筆墨間尚能髣髴其為人如此後之學者處心擇術當如何哉至元壬申重陽前四日書於平陽官舍

跋黃華墨蹟

予觀公書多矣曰黃華山主者蓋公中年筆也其格調步趨要本二王氣韻蕭散得元章之勝勁厲初不逮之然如王謝子弟以生長見聞猶足以超人羣也殷溪云題黃華與李彥明太守一十三帖彥明係公同年友也

此數帖蓋公官翰林時書也至有飢寒之厄近在旦夕
又云收拾危從秋山貧家至甚不易令人披讀可勝嘆
惋當明昌嚮文之世公以文彩風流照映一時其窘迫
乃爾豈官散祿薄未為道陵所知不然貧乃士之常事
造物者庸玉汝於成邪至於文翰之妙如荆金和璞自
有定價不待稱而後重也

跋任龍巖烏夜啼帖

南麓書在京師為最多其擘窠大書往往體莊而神滯

獨此帖豪放飛動超乎常度而未庵師謂醉後興逸妙能天成豈長沙率爾而顛字字圓轉之意邪然古人得意處非一如去乖就合意居筆先乘其調利例多高風絕塵不止藉步兵作氣而能奪三軍之帥也

跋任南麓所臨潛珍閣銘為大陽津張提舉彥亨賦總一百八字提刑王子勉目曰數珠帖

南麓書在金大定間號稱獨步然擘窠大書往往體莊而神滯今觀此帖筆勢超逸乳韻兼勝豈非抵掌談笑

善學叔教者邪

宣聖小影後跋語

金正隆六年大學生馬雲卿筆襲封衍聖公孔元措題識

宣聖肖像繪者非一據聖儀四十九表擬之猶潢潦之於河漢培塿之於泰山也孔氏云家廟所藏衣燕居服顏子從行小影最為真像此本蓋再一傳也嗚呼尊其道踐其迹是謂之恭敬不然天容日表雖參於前而倚諸衡是不幾於黷乎至元乙亥夏四月命士人王友仁臨寫小子憚百拜敬書

跋周處府君斬蛟圖後

役萬物而君之者莫靈於人而處尤以氣勝者也彼司
馬彤之虺鄙未若神蛟之變怪也老於菟之殘猛不減
氏萬年之嘯兇也處一旦視之猶尺蠖與孤豚耳乃知
擁笈之際其氣固已蓋西戎矣然有憾無援受制於人
卒為二豎所害噫千載而下令人讀臨戎之篇凜凜然
猶有生氣其晚梁王不糞土若也雲史筆之諒有激而
云

跋貫休比丘像

釋貫休比丘像予二見之此幅與東平王氏所藏衣紋精粗不同恐學道子兩部圖鬼物筆法也

跋陶縝生菜圖

蔬果猶犬馬然以其恒見而難為工故生意彩色有郊圃水濱之異縝之筆不見收于御譜而為金陵所題詠所謂一杯密雲龍足以知名於當代也

跋范中立茂林秋晚圖

中立初年本學營丘極平遠迴秀之狀至於山骨鬱茂
林麓幽邃咫尺杳靄遠隔千里蒼然若太陰雷雨不可
端倪茲蓋居終南晚年之筆也故當時有并墨如泥之
目是知游藝雖宗匠前修唯其胸中自有一天乃能造
微入妙

題寄寄老人陳氏詩卷

昔帝舜陶於河濱器不苦窳而陶之為器最近古而適
用廣長安寄寄翁得適用近古之法削為鼎研諸器堅

潤精緻粹然含金玉之質誠可方駕保張遠紹澤之呂道人矣

題王生臨道子橫吹等圖後

書與畫同一闕紐唐賢善臨書宋人工點本要之極形似而出神爽為佳蒲江王生以讀書餘暇游藝丹青於臨放為尤能蓋致思詳雅不為法度窘束筆與意會探天機所到近為予點道子馬融橫吹營丘寒江晚浦為可見昔龍眠作李北平射邊騎圖觀矢之所直迺應絃

斃也若向作著矢狀則風斯在下矣知此則能造微入妙文甫其沉潛可也丙子清明日書于行館之敬止堂

跋馬氏家譜圖後

夫源深則流長本盛則末茂至於家世蕃衍碩大亦由忠厚之培植德澤之淵浸者耳燕著姓馬氏自遼歷金代有顯人故居河朔者多大墳是歸昔狄武襄以族係不明不敢附梁公之後時人題之今絳尹馬君出示茲譜曰此某之高曾也皇顯也降而下之曰伯曰從曰昆

曰仲聯綿次序蔚為一宗蓋亦有自來矣於戲盛哉

遊澤州青蓮寺題示

至元甲戌夏四月戊午予以分閱澤潞州兵且需後命
乘暇同州尹皇甫琰來遊茲山相與登福嚴佛閣置酒
小酌歛林風振響山雨驟至煩襟塵思灑然一醒少焉
返照入壑其西南諸峯雲起曳縷及頂而散縈紆披拂
如六銖僧衣空濛法身既暮羣動俱闌溪流有聲淙淙
丹壑如萬馬千兵奔赴敵場靜夜遠聞耿耿忘寐顧謂

皇甫君曰此豈非山靈化現以清雄之狀娛遊人之耳目邪凡所得唱和詩若干首因留題釋院壁間以為它年林下故事從遊者沁水尹大原李汝翼屬吏丘山甫承直郎平陽路總管府判官汲郡王惲題子翁孺侍行

絳州後園題名

絳以兩州六縣三十萬戶之盛守治一園甲河東而名天下者宜矣至元壬申春予自霜臺來官平陽適陽威人有獄疑而未能決者四年遂被命來讞授館絳園留

十有七日既集事因披讀唐已來園池圖記按觀遺跡
莽為污宮獨有老樹歌臺荒池漲水想像當時亭榭竹
木之勝環合覆壓倒影明滅猶在瑤翻碧澈中耳感今
懷古因以見物理之盛衰知哀樂之不恒也同來者屬
掾李諶鄭宸子翁孺侍行是歲夏六月初伏後二日汲
郡王惲題

跋秦得真墨軸後

墨之名家者唐已來不數人其難工也若是如坡公尚

煤松自劑放潘谷漆法至竈發舍焚曾無倦色宜乎秦
君嗜之而不厭也蓋將紹潘張之絕藝發潛德之幽光
耶予近以沉煙寶劑就龍尾石試之其黑而能光清而
不汨迺知精妙入神方駕前輩為諸公所稱適宜矣

祭霍山祠題名

至元九年冬朝廷以郡邑鎮山大浸載諸典秩者所司
三載一祀霍岳在河東實為靈鎮故事每歲以仲夏土
屬之日用信報禮昭度度也明年癸酉夏六月廿二日

惲行縣北走霍邑前次洪洞雨不克邁越翼日抵趙城
適嚴祀省牲之夕迺率霍州判官連漢臣監縣事塔的
尹裴國用主縣簿劉偉齋宿祠下將事之夕霧雨交作
既祀之朝陰霾四開三獻禮成冷風肅然神峯驚巖軒
豁呈露雖韓潮陽之禮衡岳孔廣州之祀南海不足以
喻其快也陪祀者府兵曹解禎縣佐史高政稅監張承
慶邑人薛昌齡嶽廟道士李志真興唐寺僧普光執事
者吏王庭玉等一十五人遂相與饜飫神貺而退承直

郎平陽路總管府判官汲郡王惲題記從行者閻山張
思誠子翁儒

跋唐忠祚條白頭翁圖

忠祚前宋人宣
和畫譜有傳

前人稱忠祚畫不唯極其形似如花美而艷竹野而天
能狀物之性為好耳余尤愛其科條勁挺放筆而成得
妙意於法度之外殆書家所謂錐畫沙也乃知畫與翰
墨同一闢紐豈虛言哉

跋楊息軒江灣漁樂圖

予初不解畫工拙非所知但開卷瀟洒見漁家風味令人渺然有江湖塵外之思不知何時得帶簑簪以駕船獨聳牙而揮車去作西溪漫叟為畫家所傳寫似亦不虛負此生矣

跋甫田圖後

近與李野齋讀岷隱先生詩說沖沖然殊有所得及觀是圖其經國備物之制傷今懷古之思令人想見三代忠厚氣象如在其間親承其事至於禽魚草木車服

豆籩之盛一一視之皆具古意又有可觀可興者撫卷
三嘆不覺慨然孰謂丹青形容起予至於斯邪至元戊
寅入夏五日題

跋藏春劉公東亭等帖

此太保劉公書也觀其筆法若不作意故飄逸如此絕
似長沙素苔磯靜釣等帖識者當以予言為不妄黃氏
裝潢者能愛之以為珍藏豈性與藝習而相近然邪

自題所書草字後

今日午睡起偶作草字數行因悟筆勢貴其神速要如李愬夜半乘雪出其不意乃能入懸瓠城縛取元濟爾

又題草書後

草書筆勢至傾敧斷續當如歌三百篇會意時手舞足蹈不知其為顛頓也

題丙博陽問牛圖後

蕭曹稱漢賢相然未免有牛飲池汚之論豈狃於休息重夫更化者乎及博陽秉鈞閭閻略細務每以變和為心

神爵五鳳間蔚然有聲為中興名臣以二公較之佐命
外吉寅亮之功有足多者胡氏謂體元者人君之事調
元者宰相之職信哉彼闔里門而消沴因淖車而被謗
者坐享堂封無所事事曾不若丞相嘔茵吏耳予適纂
述調元事鑑友人敬之之子公讓請題其後故書

題賈本蘇才翁帖後

蘇滄浪書多出懷素山谷草聖本學才翁如戎州所書
漫興九詩何啻青出於藍真起凡入聖筆也若此者何

為者哉所謂真贗不較可知至於樗軒所題真蹟蓋自別卷移之於此耳至元戊寅夏六月十六日午睡覺後題王郎中國範所藏唐翰林供奉畫玄宗幸蜀

圖

世知天寶之禍階於九齡罷相政歸楊李不知枉害忠良一言玄宗已為聲色蠱惑其明理亂顛倒莫知所從逮夫九縣颺馳越在草莽方思曲江忠諫遣使祭墓嗟何及矣今觀是圖自馳出大內宮衛依然供頓咸陽父

老進說次馬嵬而六師不前痛九廟而太子北駕至犒
遣扶風蹕蹕蜀道彷徨躑躅起馬如擣之懷去五百餘
載按圖思事如在目前令人動被髮伊上之感可謂畫
中有史其垂戒深矣

跋黃華題郭壽卿雙溪圖

雙溪余家山物也今觀公此作所謂詩中有畫畫未必
能得真矣

題開閑公書祈宰傳後

此祁忠義贊也蓋公在河北時所書以老筆所至自成一家觀之似未免效顰耳然堂堂之氣已破碎陣敵矣

題坡軒先生詩卷後

予嘗于鹿庵讌席見老人數輩衣冠楚楚容止足觀當時顯官有不復及者詢之皆前朝權釀官也而况坡軒者乎先生在大定間調監相酒其風流文采照映一世時賢與之不在明昌詞人之下所存片言隻字猶當享之千金自非篤好有睨而不顧者夢卿出將家喜詩學

固能寶而藏之異時醞酒臨江助吾橫槊之氣者不為
無得於斯文也

題李懷遠世系後

李鎬字之京涿之定興人父金大定間進士第終蘭州
刺史先生姿冲澹樂山水初蘭州府君官鳳翔府近山
多勝槩公日登覽怡說至樂而忘歸自是畫品日進壯
渡后留寓淇上僕猶及識之番番然一良士也嘗作樊
樓風雨春雲出谷二圖大為東瀛子蕭公所賞識曰士

夫間不多見也以門勞官至懷遠大將軍集慶軍節度
副使壽六十五卒于衛子師孟字希賢今年七十有五
為人質直好義無它腸精力強明飲啖不少衰時尚
能浮大白酣適簪花曳杖游行閭里予每遇諸塗更忙
與從容抵掌談平日心事初不以惇獨而屑懷也然未
免作句讀師自給其日料焉復為一慨然耳戊子歲端
月上元日秋澗老人書且得載郡志寓居之列云

跋桑維翰手簡

國僑在五代間本無書名今觀是帖其策勲於鐵研間者恐不獨專美於疑式也具眼者當以予言為不妄秋澗老人題

跋澹游王先生詩後

黃華先生以海嶽精英之氣發而為文章翰墨當明昌間照映一時惟其早世識者至今惜之余向客京師好事家屏圍幘軸無非澹游詩翰迺知老成雖遠典刑盡見于是此幅公之老筆尤瀟灑可愛豈神完守固氣自

清明雖耄而不良者邪戊子冬陽生後一日秋澗惲謹
題

題雲麾帖後

李北海書融液屈折紆餘妍溢一法襖飲序但放筆差
增其豪豐體使益其媚如盧綯下朝風度閒雅縈轡回
策儘有蘊藉三郎顧之不覺歎美東坡云予書初學李
江夏後來自成一家及以雲麾帖一一較之坡第按之
稍扁而青出於藍耳蘭亭在古今為真行之祖自太宗

宗尚一代學者爭師宗之然如徐季海輩尚未免詰體之俗況餘人乎公于斯時獨能高視遠步造微入妙臨池策勛固當為右軍忠臣矣有具眼者出乃知余言為不妄戊子冬孟秋澗老人王惲謹題

跋米南宮書曾夫人墓誌後

顏魯公稱殷成已雅善填書嚮見唐人作襖飲序每行特留二三白者使見其已者之功夫耳初觀是帖即疑其神爽索然乏飛動縹緲之勢再視之乃知為成已法

也緣襄陽出奇無窮雖憑軾縱觀不無看朱成碧耽嗜者心摹手追豈不踐迹終不入于室邪夢卿來託審定所見如此於戲夢卿其寶之安知飛電流雲之駭不踵門而至者乎戊子歲秋八月廿七日秋澗老人題

跋香林先生老饕賦後

真楷有常規而顛草無定態魯公傳長史之法東坡得魯公之妙至于率爾而顛餘未見能旭也今觀此帖馳騁長沙氣劇禱佛之壘耳嗚呼百年來人物淵源之盛

槩可見矣先生姓田字信之前進士蒙城人學顏而至者也晚進王惲謹題

跋唐韋臯畫像

予嘗觀臯王畫像魁偉奇傑顏赫奕視猛而髯戟如老
黑抗首有百獸不敢傍之氣不如何以破吐蕃四十
八萬之衆擒殺節度都督籠官千五百名乎至外臣自
預政抗章勸進軍旅之目以定秦鏤號其豪侈橫恣在
所不論及歿有司欲追繩其咎賴門士陸暢者得解至


今盛名有光于蜀嗚呼竹頭木屑其可忽也哉秋澗老人偶題

題三百家詩選後

潛溪稱唐人尤用意小詩其命意與所敘述初不減長篇而促為四句意工理盡高簡頓挫所以難耳故心有可書之事如王摩詰云西出陽關無故人故行者為可悲而勸酒者不得不飲陽關之詞不可不作余亦曰自簡古而發穠纖由穠纖而出議論此小詩所以最難工

者也且唐詩名世者千有餘家此特三百而已又鄱陽
初選時意不到此間有三合者亦足以見侏儒一節之
驗也且書學成于晉歌詩極于唐而論解之學盛于宋
雖然非數百年涵養積習之久不克成就如是迹其所
以然蓋皆自上之所好中來何則嘗觀初學記載太宗
文皇帝御製無題無詩及其文子文孫例能賦詠又唐
之士人不能是者不復清流比數習俗安得不從風而
靡哉二生經史外行若有餘此亦不可不知故令一讀

使見前賢雖小道其用意有如此者因書以為示己丑
重午日秋澗老人題



秋澗集卷七十一